

## MASTRU GIUANNE IN PENSIONE

Mastru Giuanne finz'a sa 'ezzesa  
no hat bidu che penas e fadigas:  
miserias presentes e antigas  
ue est passadu, sempre poveresa;  
foghiles istudados cun sa mesa  
piena solu 'e murrunos e brigas,  
ispanzadas de fame e deunzu  
da-e su pagu pane e pag'anzu.

Isvilidu 'e tantos patimentos  
fit gai gai a dare dispidida  
a s'impiegu e cambiare vida  
pro no intender ateros lamentos  
e intrar'in sa classe 'e "sos cuntentos"  
zente pensionada e no famida,  
pro che passare sos ultimos annos  
in tranquillidade e senz'affannos.

No connoschiat sos pensionados  
e los creiat rastos e attatos,  
padronos de terrinos e palattos  
e de 'inaris finzas murgherados;  
ma tres nd'incontrat lanzos fadigados,  
malancinidos e gai maltrattos  
chi l'han fatt'una tal'impressione  
de zente essinde da una presone.

E duos fini contende sas dies  
cantu nde mancaiat a su trèighi:  
a umu li pariat chi fin sèighi,  
s'ateru: "Degheotto mesudies  
deven benner ancora ma no sies  
isvariadu o cheres chi ti prèighi  
chi custu mese no est de vintotto  
e pro cussu nde mancat degheotto"?

Aggiunmai si fini raffiados  
pro cussas duas dies in cuntestu.  
Benit Mastru Giuanne a passu lestu  
e si presentat a sos tribulados  
nende: "Allegros, o pensionados,  
chi deo puru cantu pius prestu  
e a segundu sa condizione  
'e sa classe, mi nd'enz'in pensione.

"Deo so reduidu terra terra  
- ndi essit umu - e primi fia reu,  
ca tando mi deian pan'intreu  
e como mi nde toccat una perra;  
chie narat ch'est culpa 'e sa gherra  
atere chi castigos sun de Deu,  
e no che mancaisti si no tue,  
cane runzosa, bessi da' igne"!

*Nicolino Cuccureddu*

PENSIONATO - VIA SARDEGNA, N. 3  
ORISTANO (Cagliari)